

四庫全書

史部

欽定四庫全書

水經注釋卷二十七

仁和趙一清撰

沔水上

沔水出武都沮縣東狼谷中

沔水一名沮水闌駟曰以其初出沮洳然故曰沮水也縣亦受名焉導源南流泉街水注之水出河池縣東南入沮縣會于沔

一清按漢志武都郡河池縣泉街水南至沮入漢行五百二十

里秦隴之大川也而漾水注又有河池水
出河池北谷西南入濁水別是一水也 沔水又東

南逕沮水戍而東南流注漢曰沮口所謂沔漢者也

尚書曰嶓冢導漾東流為漢山海經所謂漢出鮎嶂

山也東北得獻水口庾仲雍云是水南至闕城合西

漢水又東北合沮口同為漢水之源也故如淳曰此

方人謂漢水為沔水故孔安國曰漾水東流為沔蓋

與沔合也至漢中為漢水是互相通稱矣沔水又東

逕白馬戍南瀘水入焉水北發武都氐中南逕張魯

城東魯沛國張陵孫陵學道於蜀鶴鳴山傳業衡衡
傳於魯魯至行寬惠百姓親附供道之費米限五斗
故世號五斗米道初平中劉焉以魯為督義司馬佳
漢中斷絕閣道用遠城治因即峭嶺周迴五里東臨
瀋谷杳然百尋西北二面連峰接崖莫究其極從南
為盤道登陟二里有餘瀘水又南逕張魯治東水西
山上有張天師堂于今民事之庾仲雍謂山為白馬
塞堂為張魯治東對白馬城一名陽平關瀘水南流

入沔謂之瀘口其城西帶瀘水南面沔川城側二水之交故亦曰瀘口城矣沔水又東逕武侯壘南諸葛武侯所居也南枕沔水水南有亮壘背山向水中有小城迴隔難解沔水又東逕沔陽縣故城南城舊言漢祖在漢中蕭何所築也漢建安二十四年劉備并劉璋北定漢中始立壇即漢中王位于此城其城南臨漢水北帶通遠南面崩水三分之一觀其遺略厥狀時傳南對定軍山曹公南征漢中張魯降乃命夏

侯淵等守之劉備自陽平關南渡沔水遂斬淵首保
有漢中諸葛亮之死也遺令葬于其山因即地勢不
起墳壟唯深松茂栢攢蔚川阜莫知墓塋所在山東
名高平是亮宿營處有亮廟亮薨百姓野祭步兵校
尉習隆中書郎向充共表云臣聞周人思召伯之德
甘棠為之不伐越王懷范蠡之功鑄金以存其像亮
德軌遐邇勲蓋來世王室之不壞實賴斯人而使百
姓巷祭戎夷野祀非所以存德念功追述在昔者也

今若盡順民心則蹟而無興建之京師又逼宗廟此
聖懷所以惟疑也臣謂宜近其墓立之沔陽斷其私
祀以崇正禮始聽立祀斯廟蓋所啟置也鍾士季征
蜀枉駕設祠營東即八陣圖也遺基略在崩褫難識
沔水又東逕西樂城北城在沔陽東山上周三十里
甚險固城側有谷謂之容裴谷道通益州山多羣獠
諸葛亮築以防遏梁州刺史楊亮即嶮之固保而居之
為苻堅所敗後刺史姜守藩猛亦相仍守此城城東

容表谿水注之俗謂之洛水也水南導巴嶺山東北
流水左有故城憑山即險四面岨絕昔先主遣黃忠
據之以拒曹公谿水又北逕西樂城東而北流注于
漢漢水又左得度口水出陽平北山水有二源一曰
清檢出佳鱖一曰濁檢出好鮒常以二月八月取之
美珍常味度水南逕陽平縣故城東又南逕沔陽縣
故城東而南流注于漢水又東右會溫泉水口水發
山北平池方數十步泉源沸湧冬夏湯湯望之則白

氣浩然言能瘥百病云洗浴者皆有硫黃氣赴集者
常有百數池水通注漢水漢水又東黃沙水左注之
水北出遠山山谷邃峻人跡罕交谿曰五天谿水側
有黃沙石諸葛亮所開也其水南注漢水南有女郎
山山上有女郎冢遠望山墳窈窕狀高及即其所裁
有墳形山上直路下出不生草木世人謂之女郎道
下有女郎廟及倚衣石言張魯女也有小水北流入
漢謂之女郎水漢水又東合褒水水西北出衙嶺山

東南逕大石門歷故棧道下谷俗謂千梁無柱也諸葛亮與兄瑾書云前趙子龍退軍燒壞赤崖以北閣道緣谷一百餘里其閣梁一頭入山腹其一頭立柱於水中今水大而急不得安柱此其窮極不可強也又云頃大水暴出赤崖以南橋閣悉壞時趙子龍與鄧伯苗一戍赤崖屯田一屯赤崖口但得緣崖與伯苗相聞而已後諸葛亮死于五丈原魏延先退而焚之謂是道也自後棄舊修路者悉無復水中柱逕涉者

浮梁振動無不搖心眩目也褒水又東南逕三交城

城在三水之會故也一水北出長安一水西北出仇

池一水東北出太白山是城之所以取名矣

初學記
岐州引

水經注曰桐池水東北流入三交水今本無之褒字
記鳳翔府寶雞縣下云三交故城在縣西四十六里
者舊傳司馬宣王與諸葛
亮相拒于此因築此城褒水又東南得丙水口水

上承丙穴穴出嘉魚常以三月出十月入地穴口廣

五六尺有泉懸注魚自穴下透入水穴口向丙故曰

丙穴下注褒水故左思稱嘉魚出於丙穴良木攢於

褒谷矣褒水又東南歷小石門門穿山通道六丈有
餘刻石言漢明帝永平中司隸校尉犍為楊厥之所
開連桓帝建和二年漢中太守同郡王升嘉厥開鑿
之功琢石頌德以為石牛道來敏本蜀論云秦惠王
欲伐蜀而不知道作五石牛以金置尾下言能屎金
蜀王負力令五丁引之成道秦使張儀司馬錯尋路
滅蜀因曰石牛道廢蓋因而廣之矣蜀都賦曰岵山
石門其斯之謂也

隸釋司隸校尉楊孟文石門頌唯
靈定位川澤股肱澤有所注川

有所通余台之川其澤南隆八方所達蓋域為充高
祖受命興於漢中道由子才出殷入秦建定帝位以
漢誠駕弼後以子才塗路艱難更隨園台復通堂光
凡此四道坡高无尤難至于永平其有四事詔書開
余鑿通石門中遭元二西東官殘橋梁斷絕子才復
修上則縣峻屈曲浮顛下則入冥冥頻寫輪淵平
河源泥常蔭鮮晏木石相拒利磨礪略臨危捨楊履
尾心寒因興輕騎適尋弗前慮宏弊狩地蛭毒蟻未
秋截霜稼苗麦秋殘終年不登匱餒之患卑者楚惠
尊者弗安愁苦之難為可具言於是明知政司諫校
尉捷為武陽楊君厥字孟文深執忠仇數上奏請有
司議駁君遂執爭百途咸從帝用是聽廢子由斯得
其度經功飭雨要故而晏平清涼調和桑二艾寧至
建和二年仲冬上旬漢中太守捷為武陽王升字稚
紀涉歷山道推序本原嘉君明知美其仁賢勒石頌
德以明厥勲其辭曰君德明明炳煥彌光刺過拾遺

厲清八荒奉魁冰杓綏億衝疆春宣聖曰秋貶若霜
無偏蕩蕩真雖以方寧靜烝庶政與乾通輔主匡君
循禮有常咸曉地理知世紀綱言必忠義匪石履章
弘弘大節諫而益明揆往卓今謀合朝情解艱即安
有勲有榮禹鑒龍門君其繼蹤上順片斗下荅川
皇自南自北四海攸通君子安樂庶土_字悅靡商人
咸悌農夫永同春秋記異今而紀功垂泝億載世世
嘆誦序曰明哉仁知豫識難易原度天道安危所歸
勤勤謁誠榮名休麗五官掾南鄭趙邵字季南屬褒
中量漢疆字產伯書佐西成王戒字文寶主王府君
閑台道闕難分置六部道橋特遣行丞事西成輔服
字顯公都督掾南鄭魏整字伯玉後遺趙誦字公梁
案察中曾卓行造作石藉萬世之基或解高格下就
平易行者欣然焉伯玉即曰從署行丞事守安陽長
洪氏迺曰華陽國志楊君名渙又曰故司隸校尉捷
為楊君頌隸額在興元成宗建和二年漢中太守王

升立碑云司隸校尉楊君厥字孟文水經及歐趙皆謂之楊厥碑蜀中晚出楊淮碑云司隸校尉楊君厥諱淮字伯邳大司隸孟文之元孫也始知兩碑皆以厥為語助此乃後政頌其勲德故尊而字之不稱其名順帝紀延光四年詔益州刺史罷子午道通褒斜路蓋從其所請也子午長安正南山名褒斜者漢中谷名高祖開石門史策不書亦見邨閭碑平帝時王莽以皇后有子孫瑞遂通子午永平之詔史亦闕文安帝永初元年先零叛斷隴道寇三輔入並州殺漢中守乃橋梁斷絕時也自明帝永平四年通石門至永初幾五十年自永初衰斜斷絕至延光四年凡十五年水經云石門穿山通道六丈有餘即秦人取蜀之石牛道楊君因而廣之蜀都賦岨以石門是也門在漢中之西褒中之北褒水南歷褒口北出斜谷碑以余谷為斜谷充為衝詆為抵茲為滋蔭為陰遠為寮莽行為蹇蹇衝為梁縱為蹤悖為喜藉為積西成

為西城高即高字塗即塗字斷即斷字勝即盤字邊
即滯字尋即礙字惡即惡字彊即疆字底即恆字醜
即釋字繼即繼字隸辨曰墨寶云褒城縣北五里磨
崖額題云故司隸校尉隸為楊君頌十隸字碑式云
碑文六十七行行三十字或有疎密不齊者高祖受
命平關命字垂筆甚長所侵兩字許又空二字方書
其下一句序曰別作行後一行低二字書趙邵等三
人姓名又書王府君分遣官屬事凡三行末行低七
字書魏伯玉徙官隸續云宣和殿碑錄以碑為量漢
彊書考其碑云五官掾南鄭趙助屬褒中量漢彊書
佐西成王戒蓋二人主其事非量漢彊書也一清按
此碑載張鳴鳳西遷注彼所親睹者惠宏帶跋是惡
蟲敝獸安危所歸是安危所繫可補隸釋之遺寰宇
記云洵陽縣心山漢宣帝時北平陽厥為漢中守經
此山有棲遁意不之郡學道感瑞見金羊因易姓羊
氏蓋傳聞之繆爾又晉書云山簡與譙郡嵇紹沛郡

劉謨弘農楊淮齊名即門在漢中之西褒中之北褒蜀中晚出碑其人也

水又東南歷褒口即褒谷之南口也北口曰斜所謂北出褒斜褒水又南逕褒縣故城東褒中縣也本褒國矣漢昭帝元鳳六年置褒水又南流入于漢漢水又東逕萬石城下城在高原上原高十餘丈四面臨平形若覆甌水南過水為岨西北並帶漢水其城宿是流雜聚居故世亦謂之流雜城漢水又東逕漢廟堆下昔漢女所遊側水為釣臺後人立廟于臺上世人

觀其頽基崇廣因謂之漢廟堆傳呼乖實又名之為漢武堆非也

又東過南鄭縣南

縣故褒之附庸也周顯王之世蜀有褒漢之地至六國楚人兼之懷王衰弱秦略取焉周赧王二年秦惠王置漢中郡因水名也者舊傳云南鄭之號始于鄭桓公桓公死于犬戎其民南奔故以南鄭為稱即漢中郡治也漢高祖入秦項羽封為漢王蕭何曰天漢

美名也遂都南鄭大城周四十二里城內有小城南
憑北結環雉金墉漆井皆漢所修築地沃川嶮魏武
方之雞肋曰釋騏驎而不乘焉皇皇而更求遂留杜
子緒鎮南鄭而還晉咸康中梁州刺史司馬勲斷小
城東面三分之一以為梁州漢中郡南鄭縣治也自
齊宋魏咸相仍焉水南即漢陰城也相承言呂后所
居也有廉水出巴嶺山北流逕廉川故水得其名矣
廉水又北注漢水漢水右合池水水出旱山

一清按
漢志漢

中郡南鄭縣旱山池水所出東北入漢冢宇記
南鄭縣旱山下有石池水多蓴菜即此水也 山下

有祠列石十二不辨其由蓋社主之流百姓四時祈

禱焉俗謂之獠子水夾溉諸田散流左注漢水漢水

又東得長柳渡長柳村名也漢太尉李固墓碑銘尚

存文字剝落不可復識漢水又東逕胡城南義熙十

五年城上有密雲細雨五色昭章人相與謂之慶雲

休符當出曉乃雲霽及覺城崩半許淪水出銅鍾十

二枚刺史索邈奉送洛陽歸之宋公府南對扁鵲城

當是越人舊所逕涉故邑流其名耳漢水出于二城之間右會磐余水水出南山巴嶺上泉流兩分飛清派注南入蜀水北注漢津謂之磐余口庾仲雍曰磐余去胡城二十里漢水又左會文水水即門水也出胡城北山石穴中長老云杜陽有仙人宮石穴宮之前門故號其川為門川水為門水東南流逕胡城北三城竒對隔谷羅布深溝固壘高臺相距門水右注漢水謂之高橋谿口漢水又東黑水注之水出北山

南流入漢庾仲雖曰黑水去高橋三十里諸葛亮牋云朝發南鄭暮宿黑水四五十里指謂是水也道則百里也

又東過成固縣南又東過魏興安陽縣南沔水出自旱

山北注之

一清按觀道元釋魏興安陽之文則此條經文疑後人所續增

常璩華陽國志曰蜀以成固為樂城縣也安陽縣故隸漢中魏分漢中立魏興郡安陽隸焉沔水出西南而東北入漢左谷水出西面而東北入漢左谷水出

漢北

一清按漢志漢中郡安陽縣左谷水出北南入漢所云出北出安陽縣之北也道元注云出漢

北非

即聶水也北發聽山山下有穴水穴水東南流

歷平川中謂之聶鄉水曰聶水川有唐公祠唐君字

公房成固人也學道得仙入雲臺山合丹服之白日

升天雞鳴天上狗吠雲中唯以鼠惡留之鼠乃感激

以月晦日吐腸胃更生故時人謂之唐鼠也公房升

仙之日聶行未還不獲同階雲路約以此川為居言

無繁霜蛟虎之患其俗以為信然因號為聶鄉故水

亦即名焉百姓為之立廟于其處刊石立碑表述靈

異也

隸釋仙人唐公房碑云君字公房成固人蓋帝堯之嗣

陰陽騰清躡浮命壽無疆王公之尊則四海之富曾

綱五毛天地之性斯其至貴者也耆老相傳以為至

美居攝二季君為郡吏

綱四土域啖瓜旁有真人左右莫察而君獨進美瓜又從而敬禮之真人者遂與

閑期駕谷口山上乃與神藥曰服藥以後當移意萬

里知鳥獸言語是時府在西城去家七里餘里休謁

往徠轉景即至閭郡驚焉白之府君從為御史

輒車被具君乃畫地為獄召臯誅之視其腹中果有

被具府君兩賓燕欲從學道公房頌無所進府君怒

勅尉部吏收公房妻子公房乃先歸於谷口呼其師

告以尼急其師與之歸以藥飲公房妻子曰可去矣

妻子孿家不忍去又曰豈欲得家俱去乎妻子曰固

所願也於是乃以藥塗屋柱飲牛馬六畜類吏有大
風玄雲來迎公勝妻子屋宅六畜備然與俱去昔高
松崔白皆一身得道而公勝舉家俱消盛矣傳曰賢
者所存澤流百世故使智鄉春夏毋蚊蠅秋冬鮮繁
霜厲蠱平遐去其螟蟻百穀收入天下莫知斯德祐
之效也道字羣仙德潤故鄉知德者鮮歷世莫紀漢
中太守南陽郭君諱芝字公載修北辰之政駿周邵
之風歆樂唐君神靈之美以為道重者名劬德厚者
廟尊乃發喜教躬捐奉錢倡率羣義繕廣斯廟闕和
祈福布之兆民刻石昭音揚君靈譽其辭曰闕遂享
神藥起浮雲兮朝剛洪氏适曰美即
莽字賀即堦字龍即鼠字寧即戀字
智水南歷智鄉

谿出山東南流逕通關勢南山高百餘丈上有白奴

城方五里濬塹三重高祖北定三秦蕭何守漢中欲

修北道通關中故名爲通關勢智水又東逕七女冢
冢夾水羅布如七星高十餘丈周迴數畝元嘉六年
大水破墳墳崩出銅不可勝計得一博刻云項氏伯
無子七女造鄰世人疑是項伯冢水北有七女池池
東有明月池狀如偃月皆相通注謂之張良渠蓋
良所開也智水逕樊噲臺南臺高五六丈上容百許
人又東南逕大成固北城乘高勢北臨智水水北有
韓信臺高十餘丈上容百許人相傳高祖齋七日置

壇設九賓禮以禮拜信也。輦水東迴南轉又逕其城東而南入漢水謂之三水口也。漢水又東會益口水出北山益谷東南流注于漢水。漢水又東至瀟城南與洛谷水合。水北出洛谷谷北通長安其水南流右則瀟水注之水發西谿東南流合為一水亂流南出際其城西南注漢水所謂洛口也。漢水又東逕小成固南。州治大成固移縣北故曰小成固。城北百二十里有興勢坂。諸葛亮出洛谷成興勢置烽火樓處通。

臨漢水東歷上濤而逕于龍下蓋伏石驚湍流屯激
怒故有上下二濤之名龍下地名也有邱郭墳墟舊
謂此館為龍下亭自白馬迄此則平川夾勢水豐壤
沃利方三蜀矣度此溯洄從漢為山行之始漢水又
東逕石門灘山峽也東會酉水水北出秦嶺酉谷南
歷重山與寒泉合水東出寒泉嶺泉湧山頂望之交
橫似若瀑布頽波激石散若雨灑勢同厯原風雨之
池其水西流入于酉水酉水又南注漢謂之酉口漢

水又東逕媯墟灘世本曰舜居媯汭在漢中西域縣

或言媯墟在西北舜所居也或作姚墟故後或姓姚

或姓媯媯姚之異是妄未知所從余按應劭之言是

地於西域為西北也

一清按因學記聞曰舜居媯汭其後因姓媯氏左傳正義曰世

本舜姓姚氏虞思猶姓姚也至胡公周乃賜姓為媯

漢水又東逕猴徑灘山多

猴猿好乘危啜飲故灘受斯名焉漢水又東逕小大

黃金南山有黃金峭水北對黃金谷有黃金戍傍山

依峭嶮折七里氏掠漢中岵此為戍與鐵城相對一

城在山上容百餘人一城在山下可置百許人言其
險峻故以金鐵制名矣昔楊難當令魏興太守薛健
據黃金姜寶據鐵城宋遣秦州刺史蕭思話西討話
令陰平太守蕭坦攻板之賊退酉水矣漢水又東合
蘧蔭溪口水北出就谷在長安西南其水南流逕
巴谿戍西又南逕陽都坂東坂自上及下盤折一十
九曲西連寒泉嶺漢中記曰自西城涉黃金峭寒泉
嶺陽都坂峻嶒百重絕壁萬尋既造其峰謂已踰崧

岱復瞻前嶺又倍過之言陟羊腸超烟雲之際顧看
向塗杳然有不測之險山豐野牛野羊騰巖越嶺馳
走若飛觸笑樹木十圍皆倒山殫良岨地窮坎勢矣
其水南歷蘧蔭溪謂之蘧蔭水而南流注于漢謂之
蔭口漢水又東右會洋水川流漫濶廣幾里許洋水
導源巴山東北流逕平陽城漢中記曰本西鄉縣治
也一清按寰宇記洋州西鄉縣有平西城後漢書班超平定西域有功封定遠侯晉置西鄉縣于此城方輿紀要云定遠城在西鄉縣治南後漢班超封邑也亦曰平西城晉志西鄉縣治平西城注作平陽城

下文又云謂之城陽自咸固南城南入三百八十里
水口事義全乘矣

距南鄭四百八十里洋川者漢戚夫人之所生處也

高祖得而寵之夫人思慕本鄉追求洋川米帝為驛

致長安蠲復其鄉更名曰縣故又目其地為祥川用

表夫人載誕之休祥也

全氏曰西鄉縣本晉置而戚夫人產定陶不聞為蜀女胡

三省曰道元
好竒之遇

城即定遠矣漢順帝永光七年封班超

以漢中郡南鄭縣之西鄉為定遠侯即此也洋水又

東北流入漢謂之城陽水口也漢水又東歷教頭舊

止倉儲之所傍山通道水陸險巖魏興安康縣治有
戍統領流雜漢水又東合直水水北出子午谷巖嶺
下又南枝分東注旬水又南逕從閣下山上有戍置
于崇阜之上下臨深澗張子房燒絕棧道示無還也
又東南歷直谷逕直城西而南流注漢漢水又東逕
直城南又東逕千渡而至蝦蟇頤歷漢陽瀕口而屈
于彭谿龍竈矣並溪澗灘磧之名也漢水又東逕晉
昌郡之寧都縣南縣治松谿口又東逕魏興郡廣城

縣縣治王谷谷道南出巴獠有鹽井食之令人癆疾
漢水又東逕魚脯谷口舊西城廣城二縣指此谷而
分界也

又東過西城縣南

漢水又東逕鰲池為鯨灘鯨大也蜀都賦曰沔漢湯
湯驚浪雷奔望之天迴仰之雲昏者也漢水又東逕
嵐谷北口嶂遠谿深澗峽嶮邃氣蕭蕭以瑟瑟風颭
颭而颭颭故川谷擅其目矣漢水又東右得大勢勢

岨急谿故亦曰急勢也依山為城城周二里在峻山
上梁州督護吉挹所治苻堅遣偏軍韋鍾伐挹固
守二年不能下無援遂陷漢水右對月谷口山有坂
月川於中黃壤沃衍而桑麻列植佳饒水田故孟達
與諸葛亮書善其川土沃美也漢水又東逕西城縣
故城南地理志曰西城故漢中郡之屬縣也漢末為
西城郡建安二十四年劉備以中儀為西城太守儀
據郡降魏魏文帝改為魏興郡治故西城縣之故城

也氏略漢川梁州移治於此城內有舜祠漢高帝廟
置民九戶歲時奉祠焉漢水又東為鱣湍洪波湊盪
湍浪雲頽古者舊言有鱣魚奮鰭溯流濤直上至此
則暴鯁失濟故因名湍矣漢水又東合旬水水北出

旬山

一清按漢志旬陽縣北
山旬水所出南入沔

東南流逕平陽戍下與

直水枝分東注逕平陽戍入旬水旬水又東南逕旬
陽縣與柞水合水西出柞谿南流逕重巖堡西屈而
東流逕其堡南東南注于旬水旬水又東南逕旬陽

縣南縣北山有懸書崖高五十丈刻石作字人不能上不知所述山下有石壇上有馬跡五所名曰馬跡

山旬水東南注漢謂之旬口漢水又東逕木蘭寨南

右岸有城名陵城

一清按胡三省通鑑注曰晏公類要云伎陵城在金州洵陽縣庾仲

雍漢水記即木蘭寨此文疑落伎字

周迴數里左岸壘石數十行重壘

數十里中謂是處為木蘭寨云吳朝遣軍救孟達於

此矣漢水又東左得有溪與沓洵陽分界於是谷漢

水又東合甲水口水出秦嶺山東南流逕金井城

南又東逕上庸郡北與關柎水合水出上洛陽亭縣
北清泥西山南逕陽亭聚西俗謂之平陽水南合豐
鄉川水水出弘農豐鄉東山西南流逕豐鄉故城南
京相璠曰南鄉浙縣有故鄆鄉春秋所謂豐析也於
地理志屬弘農今屬南鄉又西南合關柎水關柎水
又南入上津注甲水甲水又東南逕魏興郡之興晉

縣南晉武帝太康中立甲水又東右入漢水

一清按漢志弘

農郡上雒縣甲水出秦嶺山東南至錫入沔過郡三行五百七十里漢水又東為龍淵

淵上有胡鼻山石類胡人鼻故也下臨龍井渚淵深數丈漢水又東逕魏興郡之錫縣故城北為白石灘縣故春秋之錫穴地也故屬漢中王莽之錫治也縣有錫義山方圓百里形如城四面有門上有石壇長十數丈世傳列仙所居今有道士被髮餌术恒數十人山高谷深多生薇蕨草其草有風不偃無風獨搖漢水又東逕長利谷南入谷有長利故城舊縣也漢水又東歷姚方蓋舜後枝居是處故地留姚稱也

又東過堵陽縣堵水出自上粉縣北流注之

全氏曰堵陽即漢南

陽之屬縣也寰宇記云鄖鄉縣古錫穴縣東十里有甕牟山漢中郡與南陽郡分界處此是漢舊縣非唐初所置南豐州之堵陽也兩漢志無上粉縣疑是曹魏嘗置而旋廢者寰宇記房陵縣有粉城因粉水為名疑即上粉縣故城此經文晚出之證

堵水自建平郡界故亭谷東歷新城郡

一清按寰宇記云堵水出

金州平利縣黃平原嶺下圖經云竹山縣郭帶堵水水通漢江舟船往來商賈所湊平利縣漢為漢中郡西城縣地晉上庸郡之上庸縣也堵水源出於此宋書州郡志云建平太守吳孫休永安三年分宜都立晉又有建平都尉武帝咸寧元年改都尉為郡於是吳晉各有建平郡太康元年吳平併合堵水蓋經其

界郡故漢中之房陵縣也世祖建武元年封鄧晨為侯國也漢末以為房陵郡魏文帝合房陵上庸西城立以為新城郡以孟達為太守治房陵故縣有粉水縣居其上故曰上粉縣也堵水之旁有別谿岸側土色解黃乃云可噉有言飲此水者令人無病而壽豈其信乎又有白馬山山石似馬望之逼真側水謂之白馬寨孟達為守登之而歎曰劉封中孰據金城千里而更失之乎為上堵吟音韻哀切有惻人心今水

次尚歌之堵水又東北逕上庸郡故庸國也春秋文
公十六年楚人秦人巴人滅庸庸小國附楚楚有災
不救舉羣蠻以叛故滅之以為縣屬漢中郡漢末又
分為上庸郡城三面際水堵水又東逕方城亭而東
北歷叅山下而北逕堵陽縣南北流注於漢謂之堵
口漢水又東謂之滯灘冬則水淺而下多大石又東
為淨灘夏水急盛川多湍洑行旅苦之故諺曰冬滯
夏淨斷官使命言二灘阻礙也

又東過鄖鄉縣南

一清按漢志漢中郡長利縣有鄖關東京省併錫縣故續志無之晉太康

五年立為鄖鄉縣此魏晉間人續經之證又按三國志蜀書劉封中儀俱封員鄉侯則其時雖未立縣而

已為侯邑矣

漢水又東逕鄖鄉縣南之西山上有石蝦蟆倉卒看

之與真不別山北有崖旁視之有一穴甚明號為星

隔漢水又東逕鄖鄉縣故城南謂之鄖鄉灘縣故黎

也即長利之鄖鄉矣地理志曰有鄖關李奇以為鄖

子國晉太康五年立以為縣漢水又東逕琵琶谷口

梁益二州分境於此故謂之琵琶界也

又東北流又屈東南過武當縣東北

縣西北四十里漢水中有州名滄浪州庾仲雍漢水
記謂之千齡州非也是世俗語訛音與字變矣地說
曰水出荆山東南流為滄浪之水是近楚都故漁父
歌曰滄浪之水清兮可以濯我纓滄浪之水濁兮可
以濯我足余按尚書禹貢言導漾水東流為漢又東
為滄浪之水不言過而言為者明非他水決入也蓋

漢沔水自下有滄浪通稱耳纏絡鄢郢地連紀郢咸楚都矣漁父歌之不違水地按考經傳宜以尚書為正耳漢水又東為猗子潭潭中有石磧州長六十丈廣十八丈世亦以此州為猗子葬父于斯故潭得猗目焉所未詳也漢水又東南逕武當縣故城北世祖封鄧晨子崇為侯國內有一碑文字磨滅不可復識俗相傳言是華君銘亦不詳華君何代之士漢水又東平陽川水注之水出縣北伏親山南歷平陽川逕平

陽故城下又南流注于沔沔水又東南逕武當縣故
城東又東曾水注之水導源縣南武當山一曰太和
山亦曰叅上山山形特秀又曰僊室荊州圖副記山
形特秀異于衆嶽峰首狀博山香爐亭亭遠出藥食
延年者萃焉晉咸和中歷陽謝允舍羅邑宰隱遁斯
山故亦曰謝羅山焉曾水發源山麓逕越山陰東北
流注于沔謂之曾口沔水又東逕龍巢山下山在沔
水中高十五丈廣員一里二百三十步山形峻峭其上

秀林茂木隆冬不凋又東南逕涉都城東北故鄉名也按郡國志筑陽縣有涉都鄉者也漢武帝元封元年封南海守降侯子嘉為侯國均水於縣入沔謂之均口也

又東南過鄮縣之西南

縣治故城南臨沔水謂之鄮頭漢高帝五年封蕭何為侯國也薛瓚曰今南鄉鄮頭是也茂陵書曰在南陽王莽更名南康者也

一清按史表索隱曰音贊縣名屬沛漢書高帝紀注臣瓚曰茂

陵書何封國在南陽鄴音贊師古曰瓚說是也而或
云何封沛郡鄴縣音才何反非也案地理志南陽鄴
縣侯國沛鄴縣不云侯國也又南陽鄴縣城西見有
蕭何廟彼土又有筑水筑水之陽古曰筑陽縣與鄴
側近連接據何本傳何薨之後子祿無嗣高后封何
夫人同為鄴侯小子延為筑陽侯孝文罷同更封延
為鄴侯是知何封鄴國兼得筑陽此明驗也但鄴字
別有鄴音是以沛之鄴縣史記漢書皆作鄴明其音
同也班固泗水亭碑以蕭何相國所封與何相韻于
義無爽然其封邑實在南陽非沛縣也杜少陵詩云
漢陰槎頭遠遁逃又云漫釣槎頭縮
項編槎頭即鄴頭也亦作才何音矣

又南過穀城東又南過陰縣之西

沔水東逕穀城南而不逕其東矣城在穀城山上春

秋穀伯鯁之邑也。墟閭頽毀基塹亦存。沔水又東南逕陰縣故城西。故下陰也。春秋昭公十九年楚工尹赤遷陰于下陰是也。縣東有縣。今濟南劉熹字德怡。魏時宰縣。雅好博古。教學立碑。載生徒百有餘人。不終業而夭者。因葬其地。號曰生墳。沔水又東南得洛溪口。水出縣西北集池陂。東南流逕洛陽城北。枕洛溪谿水。東南注沔水也。一清按高洪謨穀城縣志云洛陽城在縣東一十三里莫詳何人所築遺址尚存顧祖禹曰蓋南北朝時所僑置

又南過坑陽縣東筑水出自房陵縣東過其縣南流注之

沔水又南沔水流注之水出梁州閬陽縣魏遣夏

侯淵與張郃下巴西進軍宕渠劉備軍沔口即是水

所出也

一清按寰宇記房州房陵縣下引水經注沔水作筑水沔口作筑口校勘為之辨證曰按

今記房陵穀城二縣所載則筑水自房陵流至穀城入沔其會沔處謂之筑口穀城即漢之筑陽距房陵尚三百餘里又自房陵至南鄭千二百餘里夏侯淵張郃屯漢中數暴犯巴界先主令張飛進兵宕渠與郃等戰于瓦口郃等敗收兵還南鄭漢宕渠故城乃在今渠州流江縣界時張飛以巴西太守拒郃等還南鄭則當取道今巴西無緣相拒于穀城之筑口意宕渠自有瓦口而水經注誤以為沔口今記又誤以

為菑口也宋書州郡志閩陽屬新城郡郡治房陵去閩陽必不遠汎水不應自閩陽東過巴西更歷巴渠上庸復逕筑陽水經之誤審矣菑口汎水皆常在穀城之間竊謂校勘之言似是而非也蓋張飛自拒淵卻于宕渠先主軍汎口以為聲援非張飛與戰于是處也汎口左接巴西故駐軍以應接之蜀志之瓦口乃是汎口之誤而樂史之改菑口則又非矣隋書五代志房陵郡永清縣有汎水方輿紀要云乾汊河在穀城西南三里或以為即汎水也今故流漸湮漢江水漲則乾汊河與古洋河相通水落則乾因名又云古洋河即筑水口蓋汎水與筑水同入于沔故晉分筑陽置汎陽也宋志扶風太守汎陽今晉武帝太康五年立屬南鄉仍屬順張飛自別道襲張卻於此水陽大明土斷屬此是也

卻敗棄馬升山走還漢中
一清按方輿紀要云順慶府渠縣漢巴郡宕渠縣地

東北七里有八潞山八峰起伏其下平曠江水環之不匝者一里常有烟霧濛其上山下有勒石云漢將張飛大破賊首張郃于八潞山飛所自題也江即渠江則汎水亦是渠江之支流八潞山即張飛傳所云宕渠蒙頭汎水又東逕巴西歷巴渠北新城上庸東蓋石是也

逕沔陽縣故城南晉分沔陽立自縣以上山深水急枉渚崩湍水陸逕絕又東逕學城南梁州大路所由也舊說昔者有人立學都于此值世荒亂生徒罔依遂共立城以禦難故城得厥名矣汎水又東流注于沔謂之汎口也沔水又南逕闕林山東本郡陸道之

所由山東有二碑其一即記闕林山文曰君國者不
躋高堙下先時或斷山岡以通平道民多病守長寇
軍張仲瑜乃與邦人築斷故山道作此銘其一郭先
生碑先生名輔字甫成有孝友悅學之美其女為立碑

于此隸釋郭先生碑先生諱輔字甫成其先出自有周
王季之中子為文王卿士采食于瀛壖豸武王
錫而封之後世謂之郭春秋之時為晉所并遭戰國
秦漢子孫流分來居荆土氏國立姓焉傳云聖賢之
後必有達者先生應焉其少也孝友而悅學其長也
寬舒如好施是以宗親歸懷鄉鄰高尚直已而行年
五十有二遇疾而終有四男三女咸高賢校讎富貴
顯榮可謂子孫繫者已其季女明文穎川之夫人也

感惟孝妃克昌之德登山采石致于墓道邑縉紳刻石作歌昭示來嗣其辭曰竇惟先生鄉仲之裔盛德遺祀休矣亦世孝友貞信仁恕好惠直己自求不欲榮勢綽綽令人獲道之望篤生七子鍾天之祉堂堂四俊碩大婉敬娥娥三妃行追太妃葉葉嗣福祿茂止克昌厥後身去烈左鑄石作歌昭示萬祀洪氏迺曰碑今在襄陽無歲月時代歐陽以為漢趙以為魏晉字書今碑有兩昭字晉人所諱疑此是魏刻郭君有四子碑云堂堂四俊碩大婉敬而此碑乃其季女所立何也 並無年號皆不知

何代人也沔水又東逕筑陽縣東又南筑水注之杜預以為彭水也水出梁州新城郡魏昌縣界縣以黃

初中分房陵立

一清按晉志新城郡有昌魏縣宋志云魏立即魏昌也而三國志魏明帝

紀作魏陽疑
彼文為誤

筑水東南流逕筑陽縣水中有孤石挺

出其下澄潭時有見此石根如竹根而黃色見者多

凶相與號為承受石所未詳也筑水又東逕筑陽縣

故城南縣故楚附庸也秦平郢立以為縣

一清按漢志南

陽郡筑陽縣故穀伯國春秋桓公七年書穀伯綏來朝是也穀是伯爵蓋近楚之國非楚附庸也道元誤

矣王莽更名之曰宜禾也建武元年世祖封吳貊為

侯國

一清按後漢書吳漢傳盱封亦在建武二十八年元年字誤也與汝水注吳國文正同

筑

水又東流注于沔謂之筑口沔水又南逕高亭山東

山有靈焉士民奉之所請有驗沔水又東為漆灘新
野郡山都縣與順陽沅陽分界于斯灘矣

又東過山都縣東北

沔南有固城城側沔川即新野山都縣治也舊南陽
之赤鄉矣秦以為縣漢高后四年封衛將軍王恬啟
為侯國沔北有和城即郡國志所謂武當縣之和城
聚山都縣舊嘗治此故亦謂是處為故縣灘沔水北
岸數里有大石激名曰五女激或言女父為人所害

居固城五女思復父怨故立激以攻城城北今淪于
水亦云有人葬河北墓宅將為水毀其人五女無男
皆悲巨富共修此激以全墳宅然激作甚工又云女
嫁于陰縣恨子家貲萬金而自少小不從父語父臨
亡意欲葬山上恐兒不從故命言葬我著渚下石積
上恨子曰我由來不奉教今從語遂盡散家財作石
冢積土繞之成一州長數步元康中始為水所壞今
石皆如半榻許數百枚聚在水中恨子是前漢人襄

陽太守胡烈有惠化補塞隄決民賴其利景元四年
九月百姓刊石銘之樹碑于此沔水又東偏淺冬月
可涉渡謂之交湖兵戎之交多自此濟晉太康中得
鳴石於此水撞之聲聞數里沔水又東逕樂山北昔
諸葛好為梁甫吟每所登遊故俗以樂山為名沔水
又東逕隆中歷孔明舊宅北亮語劉禪云先帝三顧
臣于草廬之中咨臣以當世之事即此宅也車騎沛
國劉季和之鎮襄陽也與健為人李安共觀此宅命

安作宅銘云天子命戎于沔之陽聽鼓鞀而永思庶
先哲之遺光後六十餘年永平之五年習鑿齒又為
其宅銘焉

水經注釋卷二十七

欽定四庫全書

水經注釋卷二十八

仁和趙一清撰

沔水下

沔水又東過襄陽縣北

沔水又東逕方山北

一清按初學記太平御覽引注文作萬山元和郡縣志襄陽縣志

並是萬字廣韻集韻方同萬傳寫作方也

山上有鄒恢碑

沈氏曰晉書鄒恢鎮襄陽得民

和鄒恢疑是鄒恢之誤

魯宗之所立也山下潭中有杜元凱碑

元凱好尚後名作兩碑並述已功一碑沈之硯山水
中一碑下之于此潭曰百年之後何知不深谷為陵
也山水曲之隈云漢女昔遊處也故張衡南都賦
曰遊女弄珠於漢臯之西漢臯即方山之異名也沔
水又東合檀谿水水出縣西柳子山下東為鴨湖湖
在馬鞍山東北武陵王愛其峰秀改曰望楚山谿水
自湖兩分北渠即谿水所導也北逕漢陰臺西臨流
望遠按眺農圃情邈灌蔬意寄漢陰故因名臺矣又

北逕檀谿謂之檀谿水水側有沙門釋道安寺即谿
之名以表寺目也谿之陽有徐元直崔州平故宅悉
人居故習鑿齒與謝安書云每有家舅縱目檀谿念
崔徐之交未嘗不撫膺躊躇惆悵終日矣谿水傍城
北注昔劉備為景升所誅乘的顱馬西走墜於斯谿
西去城里餘北流注于沔一水東南出應邵曰城在
襄水之陽故曰襄陽也是水當即襄水也一清按樂史曰荆楚
之地水駕山而上者皆呼為襄其名無城北枕沔水
定故陸澄之地記曰襄陽無襄水也

卽襄陽縣之故城也王莽之相陽矣楚之北津戍也
今大城西壘是也其上古鄆郡廬羅之地秦滅楚置
南郡號此為北部焉建安十三年魏武平荊州分南
郡立為襄陽郡荊州刺史治邑居隱賑冠蓋相望一
都之會也城南門道東有三碑一碑是晉太傅羊祜
碑一碑是鎮南將軍杜預碑一碑是安南將軍劉儼碑
並是學生所立城東門外二百步劉表墓太康中為
人所發見表夫妻其尸儼然顏色不異猶如平生墓

中香氣遠聞三四里中經月不歇今墓冢及祠堂猶
高顯整頓城北枕沔水水中常苦蛟害襄陽太守鄧
遐負其氣果拔劍入水蛟繞其足遐揮劍斬蛟流血
丹水自後患除無復蛟難矣昔張公遇害亦亡劍于
是水後雷氏為建安從事逕踐瀨溪所留之劍忽于
其懷躍出落水初猶是劍後變為龍故吳均劍騎詩
云劍是兩蛟龍張華之言不孤為驗矣

庾林曰茂先遇害在雒安

得亡劍沔流考雷次宗豫章記曰張公遇害劍飛入
襄城水中郡國志曰南邨在雒陽南千五百里有襄

陽縣潁川在雒陽東南五百里有襄城縣鄆氏蓋誤以襄城水為襄陽水也何氏曰道元與吳均同時安得引用其詩疑此書後人附益者多矣一清按南史吳均傳天監初柳惔為吳興召補主簿當道元之時均名位尚輕文字未必遂行江外義門之言可謂精審矣 汭水又逕平魯城南城

魯宗之所築也故城得厥名矣

金氏曰城係宗之所築然則何以云平魯

也或是宗之北奔後劉宗以此名之

東對樊城仲山甫所封也

金氏曰仲山甫

所封之樊在河內所謂陽樊者也非此樊也此城因樊山為名

漢晉春秋稱桓帝幸

樊城百姓莫不觀有一老父獨耕不輟議郎張溫使

問焉父笑而不答溫因與之言問其姓名不告而去

城周四里南半淪水建安中關公圍于禁于此城會
沔水泛溢三丈有餘城陷禁降龐德奮劍乘舟投命
于東岡魏武曰吾知于禁三十餘載至臨危授命更
不如龐德矣城西南有曹仁記水碑杜元凱重刊其
後書伐吳之事也

又從縣東屈西南清水從北來注之

襄陽城東有東白沙白沙北有三州東北有宛口清一

按通典樊城有宛水故有宛口之名即清水所入也沔水中有魚梁州

龐德公所居士元居漢之陰在南白沙世故謂是地
為白沙曲矣司馬德操宅州之陽望衡對宇惟情自
接泛舟褰裳率爾休暢豈待遷桂枕於千里貢深心
於永思哉水南有層臺號曰景升臺蓋劉表治襄陽
之所築也言表盛遊于此常所止憩表性好鷹嘗登
此臺歌野鷹來曲其聲韻似孟達上堵吟矣沔水又
逕桃林亭又逕岘山東山上有桓宣所築城孫堅死
于此又有桓宣碑羊祜之鎮襄陽也與鄒潤甫嘗登

之及祐薨後人立碑于故處望者悲感杜元凱謂之
墮淚碑山上又有南征將軍胡璠碑又有征西將軍
周訪碑山下水中杜元凱沈碑處洧水又東南逕蔡
州漢長水校尉蔡瑁居之故名蔡州州東岸有洧湖
停水數十畝長數里廣減百步水色常淥楊儀居上

洧楊顯居下洧

一清按松陵集皮日休答陸龜蒙詩
襄陽耆舊傳詩云偉哉洧上隱卓爾

隆中耆即指儀顯所居之地集韻洧烏猛切音替郭
璞江賦泓沕洧潒李善注曰水勢回旋之貌與洧字
義同而聲畫殊也豈唐人所見之舊者傳作洧字耶
又按武昌縣有大小洧乃大江回曲處元次山有歌

日樊水欲東流大江又北來樊山當其南此中有大
回叢石橫大江人云是釣臺水石相衝擊此中為小
回即與蔡州相對在峴山南廣昌里又與襄陽
泗也

湖水合水上承鴨湖東南流逕峴山西又東南流
注白馬陂水又東入侍中襄陽侯習郁魚池郁依范
蠡養魚法作大陂陂長六十步廣四十步池中起釣
臺池北亭郁墓所在也列植松篁于池側沔水上郁
所居也又作石洑逗引大池水于宅北作小魚池池
長七十步廣二十步西枕大道東北二邊限以高隄

楸竹夾植蓮芡覆水是遊宴之名處也山季倫之鎮
襄陽每臨此池未嘗不大醉而還恒言此是我高陽
池故時人為之歌曰山公出何去往至高陽池日暮
倒載歸酩酊無所知其水下入沔沔水西又有孝子
墓河南秦氏性至孝事親無倦親沒之後負土成墳
常泣血墓側人有咏蓼莪者氏為泣涕悲不自勝於
墓所得病不能食虎常乳之百餘日卒今林木幽茂
號曰孝子墓也其南有蔡瑁冢冢前刻石為大鹿狀

甚大頭高九尺制作甚工泝水又東南逕邑城北習
郁襄陽侯之封邑也故曰邑城矣泝水又東合洞口
水出安昌縣故城東北大父山西南流謂之白水又
南逕安昌故城東屈逕其縣南縣故蔡陽之白水鄉
也漢元帝以長沙界濕分白水上唐二鄉為春陵縣
光武即帝位改為章陵縣置園廟焉魏黃初二年更
從今名故義陽郡治也

一清按漢志汝南郡安昌南陽郡春陵本二縣也晉志云

武帝平吳分南陽置義陽郡地形志云義陽郡魏文帝置後罷晉武帝復襄宇記云義陽郡居安昌城又

云石城山山甚高峻即呂氏春秋九塞之一也晉于山上置義陽郡其故城在今信陽州西北七十里春陵續志有晉志無時則省廢矣章陵縣後漢常立為郡劉表之檀荊州拜蒯越為章陵太守見魏書劉表傳注魏武紀亦云建安二年南陽章陵諸縣復叛為張繡是也逮平荊州得其地嘗以趙儼為章陵太守而後無聞顧景范曰章陵曹魏時省入蔡陽水經注魏黃初二年更章陵為安昌縣誤也雖然猶有說西魏嘗置安昌郡并春陵縣于此蓋道元身後之事然則此文又是後來不學人所填補故迷繆其詞以拓跋為當

白水又西南流而左會昆水水導源城東南

小山西流逕金山北

一清按金山見淮水注

又西流逕縣南西

流注于白水水北有白水陂其陽有漢光武故宅基

址存焉所謂白水鄉也蘇伯阿望氣處也光武之征
秦豐幸舊邑置酒杜惟張平子以為真人南廵觀舊
里焉東觀漢記曰明帝幸南陽祀舊宅召校官子弟
作雅樂奏鹿鳴上自御埴荒和之以娛賓客又於此
宅矣白水又西合瀘水水出于襄鄉東北陽中山西逕
襄鄉縣之故城北按郡國志是南陽之屬縣也瀘水
又西逕蔡陽縣故城東南流注于白水又西逕其
城南建武十六年世祖封城陽王祉世子本為侯國

沈氏曰范史應劭曰蔡水出蔡陽東入淮

一清按自洞口以下

是十三年封所合之昆水見汝水篇定陵縣下澍水見上卷陽平關下此又以蔡水當白水蔡水見此水篇三水各有源流不得如鄰所云今於此城南更無別水唯是水可以當之

川流西注若其不東且淮源岨礙山河無相入之理

蓋應氏之誤耳

一清按道元之言誤矣蓋仲瑗所謂入淮之淮即下經丈出房陵淮山之

淮漢中廬故城在今襄陽府南漳縣東五十里蔡陽故城在棗陽縣西六十里二城相距不遠自有可達之勢今注云云直誤認作出桐柏大復山之淮清故以應說為非也

洞水又西南流注

于沔水

又東過中廬縣東淮水自房陵縣淮山東流注之

縣即春秋廬戎之國也縣故城南有水出西山山有

石穴出焉謂之馬穴山漢時有數百匹馬出其中馬

形小似巴滇馬三國時陸遜攻襄陽于此穴又得馬

數十匹送建業蜀使至有家在滇池者識其馬毛色

云其父所乘馬對之流涕

一清按劉昭郡國志補注引襄陽耆舊傳云蜀使有

五部兵家滇池者識其馬色云亡父所乘對之流涕

其水東流一百四十里逕

城南名曰浴馬港言初得此馬洗之于此因以名之

亦云乘出沔次浴之又曰洗馬廐渡沔宿處名之曰
騎亭然候水諸蠻北過是水南壅淮川以周田溉下
流入沔沔水東南逕黎丘故城西其城下對繕州秦
豐居之故更名秦州王莽之敗也秦豐阻兵于黎丘
黎丘城在觀城西二里建武三年光武遣征南岑彭
擊豐四年朱祐自觀城擒豐于黎丘是也沔水又南
與疎水合水出中廬縣西南東流至卽縣北界東入
沔水謂之疎口也水中有物如三四歲小兒鱗甲如

鯢鯢射之不可入七八月中好在磧上自曝膝頭似虎掌爪常沒水中出膝頭小兒不知欲取弄戲便殺

人或曰人有生得者摘其臍厥可以小使名為水虎

者也

朱氏謀孽箋曰孫汝澄云臍厥者水虎之勢也可為蛭藥善使內也一清按董斯張吹景集曰

陶隱居刀劍錄漢章帝建初八年鑄一金劍投伊水中厥人膝之怪引水經語亦與今文小異今伊水轉為疎水未詳摘其臍由厥字屬下即厥勝之厥也太平御覽引十道記云疎水亦名襄水襄河記云中廬有疎水注于河此水有物喚人名曰水虎生得者摘鼻可小小使之然則疎者疎之誤也荊州記生得者摘其臍厥可小小使名曰水廬合諸書語蓋明孫云蛭藥何括使云者如黃公之制蛇御虎也又山海經

云蔓渠之山伊水出焉有獸焉名曰馬腹其狀如人面虎身其音如嬰兒是食人水唐之為馬腹審哉海外經云聶耳國使兩丈虎黑齒國食稻使蛇大荒經為國中容白民之國俱使四鳥虎豺羆熊司幽黑齒元股三身張宏毛民之國俱使四鳥讀此可得使字之義矣退周之言甚辨今考古今刀劍錄云漢章帝建初八年鑄一金劍投伊水中厥人膝之怪水經注中廬縣疎水中有物如三四歲小兒鱗甲如鯪鯢膝頭似虎掌瓜常沒水中出膝頭小兒不知欲取戲弄便殺人名為水唐形狀與馬腹類蓋陶惟以水唐釋馬腹非便謂疎水即伊水也竊更有疑者按史陶以宋孝建三年生梁太清二年卒年八十五太清二年實東魏武定六年西魏大統十四年其時拓跋氏以分為二道元以孝昌二年被害距通明之歿才二十二年耳南北殊域郡書未必遂行江表藉曰有不應訛誤若此載籍流傳率多舛繆而此等著錄要為後

人彛亂不特水經注有依傳卽刀劍錄恐亦非隱居之舊也寰宇記襄州襄陽縣下云涑水亦名襄水土人呼涑水上流亦為襄名卽無定疎之為涑其誤明矣

又南過卽縣東北

汭水之左有騎城周廻二里餘高一丈六尺卽騎亭也縣故楚邑也秦以為縣漢高帝十一年

一清按漢書高祖功

臣侯表是封黃極忠為侯國縣南有黃家墓墓前有十二年封

雙石闕彫制甚工俗謂之黃公闕黃公名高為漢司徒汭水又東逕豬蘭橋橋本名木蘭橋橋之左右豐

蒿菽于橋東劉季和大養緒襄陽太守曰

沈氏曰當作襄陽太

守劉季和于橋東大養緒方合劉宏晉陽秋字叔和襄陽者舊傳作季和晉書本傳又云字和李疑為非

也此中作緒屎臭可易名緒蘭橋百姓遂以為名矣

橋北有習郁宅宅側有魚池池不假功自然通洫長

六七十步廣十丈常出名魚沔水又南得木里水會

楚時於宜城東穿渠上口去城三里漢南郡太守王

寵又鑿之引蠻水灌田謂之木里溝逕宜城東而東

北入于沔謂之木里水口也

又南過宜城縣東夷水出自房陵縣東流注之

夷水蠻水也桓溫父名彝改曰蠻水夷水導源中廬縣界康狼山山與荆山相鄰其水東南流歷宜城西山謂之夷谿又東南逕羅川城故羅國也又謂之鄢水春秋所謂楚人伐羅渡鄢者也夷水又東南流與零水合零水即沔水也上通梁州沔陽縣之默城山司馬懿出沮之所由其水東逕新城郡之沔鄉縣縣分房陵立謂之沔水又東歷軫鄉謂之軫水晉武帝

平吳割臨沮之北鄉中廬之南鄉立上黃縣治幹鄉
沔水又東歷宜城西山謂之沔谿東流合于夷水謂
之沔口也與夷水亂流東出謂之淇水逕蠻城南城

在宜城南三十里春秋莫敖自羅敗退及鄢亂次以

濟淇水是也

一清按今本左傳作及鄢亂次以濟遂無次陸德明音義曰本或作亂次以濟

其水九域志宜城縣有淇水鎮又刪定元豐九域志南漳縣有漳水沮水淇水鄢水是知經典釋文誤作其水
夷水又東注于沔昔白起攻楚引西山長谷水

字也
即是水也舊堦去城一百許里水從城西灌城東入

注為淵今熨斗陂是也水潰城東北角百姓隨水流
死于城東者數十萬城東皆臭因名其陂為臭池後
人因其渠流以結陂田城西陂謂之新陂覆地數十
頃西北又為土門陂從平路渠以北木蘭橋以南西
極土門山東跨大道水流周通其水自新陂東入城
城故鄢郢之舊都秦以為縣漢惠帝三年改曰宜城
其水歷大城中逕漢南陽太守秦頡墓北墓前有二
碑頡郢人也以江夏都尉出焉南陽太守

全氏曰都尉非京朝

官何以云出乎此
逕宜城中見一家東向頡住車視後人所妄加者

之曰此居處可作冢後卒于南陽

一清按後漢書靈帝紀中平二年春

三月江夏兵趙慈反殺南陽太守秦頡蓋死于兵亂也

喪還至昔住車處車不

肯進故吏為市此宅葬之孤墳尚整冢前有二碑清

按五字與上複蓋刪削之未盡者

城南有宋王宅王邑人雋才辯給

善屬文而識音也其水又逕金城前縣南門有古碑

猶存其水又東出城東注臭池臭池溉田陂水散流

又入朱湖陂朱湖陂亦下灌諸田餘水又下入木里

溝木里溝是漢南郡太守王寵所鑿故渠引郢水也
灌田七百頃白起渠溉三千頃膏良肥美更為沃壤
也縣有太山山下有廟漢末名士居其中刺史二千
石卿長數十人朱軒華蓋同會于廟下荊州刺史行
部見之雅歎其盛號為冠蓋里而刻石銘之此碑于
永嘉中始為人所毀其餘文尚亦可傳者其辭曰岷
城南岳烈烈離明實敷俊乂君子以生惟此君子作
漢之英德為龍光聲化鶴鳴此山以建安三年崩聲

聞五六十里雉皆屋雒縣人惡之以問侍中龐季云
山崩川竭國土將亡之占也十三年魏武平荊州沔
南彫散沔水又逕郿縣故城南古郿子之國也秦楚
之間自商密遷此為楚附庸楚滅之以為邑縣南臨
沔津津南有石山上有古烽火臺縣北有大城即楚
昭王為吳所迫自紀郿徙都之所謂郿郿虛羅之地
也秦以為縣沔水又東敷水注之水出新市縣東北
又西南逕大陽山西南流逕新市縣北又西南而右

合枝水水出大洪山而西南流逕襄陽郡縣界西南

逕狄城東南左注敖水

名勝志承天府鍾祥縣下引水經云汭水又東豐樂水注

之敖水枝水又注之今本無豐樂水之目石倉自釋云按豐樂河源出大洪山西北流逕盤石嶺溉田甚廣民賴以豐故名敖水源出黃仙洞西南流合枝水即今之直河也枝水出橫嶺西北流逕古郢縣又西南逕狄城西左注敖水所叔寗為詳析足補是注之亡方輿紀要亦云直河俗誤作池河志云池河即水經所載枝水也敖水又西南流注于沔是曰敖口沔水又南

逕石城西城因山為固晉太傅羊祜鎮荊州立晉惠

帝元康九年分江夏西部置竟陵郡治此沔水又東

南與白水合水出竟陵縣東北睢屈山一名盧屈山
西流注于沔魯定公四年吳師入郢昭王奔隨濟于
成臼謂是水者也

又東過荊城東

沔水自荊城東南流逕當陽縣之章山東山上有故
城太尉陶侃伐杜曾所築也禹貢所謂內方山至于

大別者也既濱帶沔流實會尚書之文矣

一清按漢志江夏郡

竟陵縣章山在東北
古文以為內方山

沔水又東右會權口水出章山

東南流逕權城北古之權國也春秋魯莊公十八年

楚武王克權權叛國而殺之遷權于那處是也

一清按左

傳是鬬緡以權叛楚子圍而殺之叛與殺者皆緡也
今注云云殊失本旨且事亦非在莊公十八年左氏

特為巴人伐東南有那口城權水又東入于沔沔水
楚作緣起耳

又東南與陽口合水上承江陵縣赤湖江陵西北有

紀南城楚文王自丹陽徙此平王城之班固言楚之

郢都也

沈氏曰荊州記云昭王十年吳通淦水灌紀南城決赤湖進灌郢城是紀南城郢城為二

也一清按史記索隱楚都郢今江陵北紀南城是平王更城郢今江陵東北故郢城是楚子革曰我先君

僻處荆山以供王事遂遷于郢郢與紀南為二城明矣而紀南本號郢鄰注亦未盡非城西南

有赤坂岡岡下有瀆水東北流入城名曰子胥瀆蓋

吳師入郢所門也謂之西京湖又東北出城西南注

于龍陂古天井水也廣圓二百餘步在靈谿東江隄

內水至淵深有龍見于其中故曰龍陂陂北有楚莊

王釣臺高三丈四尺南北六丈東西九丈陂水又逕

郢城南東北流謂之陽水又東北路白湖水注之湖

在大港北港南曰中湖南隄下曰昏官湖三湖合為

一水東通荒谷荒谷東岸有治父城春秋傳曰莫敖
縊于荒谷羣帥囚于治父謂此處也春夏水盛則南
通大江否則南迄江隄北還方城西方城即南蠻府
也又北與三湖會故盛宏之曰南蠻府東有三湖源
同一水蓋徙治西府也宋元嘉中通路白湖下注陽
水以廣漕運陽水又東歷天井北井在方城北里餘
廣員二里其深不測井有潛室見輒兵西岸有天井
臺因基舊隄臨際水眉遊憩之佳處也陽水又東北

流東得赤湖水口湖周五十里城下陂池皆來會同
湖東北有大暑臺高六丈餘縱廣八丈一名清暑臺臺
秀宇層明通望周博遊者登之以暢遠情陽水又東
入華容縣有靈溪水西通赤湖水口已下多湖周五
十里城下陂池皆來會同又有子胥瀆蓋入郢所開
也水東入離湖湖在縣東七十五里國語所謂楚靈
王闕為石郭陂溪以象帝舜者也
朱氏謀璋箋曰湖今國語無此語
側有章華臺臺高十大基廣十五丈左丘明曰楚築

臺于章華之上韋昭以為章華亦地名也王與伍舉登之舉曰臺高不過望國之氣祥大不過容宴之俎

豆蓋譏其奢而諫其失也

全氏曰下有脫文

言此瀆靈王立

臺之日漕運所由也其水北流注于陽水陽水又東北與柞谿水合水出江陵縣北蓋諸池散流咸所會

合積以成川東流逕魯宗之壘南當驛路水上有大

橋隆安三年桓玄襲殷仲堪於江陵仲堪北奔縊于

此橋柞谿又東注船官湖湖水又東北入女觀湖湖

水又東入于陽水陽水又北逕竟陵縣西又北納巾
吐柘柘水即下陽水也巾水出縣東一百九十里西
逕巾城下城下置巾水戍晉元熙二年竟陵郡上巾
水戍山得銅鐘七口言之上府巾水又西逕竟陵縣
北西注陽水謂之巾口水西有古竟陵大城古鄖國
也鄖公辛所治所謂鄖鄉矣昔白起拔郢東至竟陵
即此也秦以為縣王莽之守平矣世祖建武十三年
更封劉隆為侯國城傍有甘魚陂左傳昭公十三年

公子黑肱為令尹次于魚陂者也陽水又北注于沔
謂之陽口中夏口也曹太祖之追劉備於當陽也張
飛按矛于長坂備得與數騎邪趣漢津遂濟夏口是
也沔水又東得漣口其水承大漣馬骨諸湖水周三
四百里及其夏水來同浩若滄海洪潭巨浪縈連江
沔故郭景純江賦云其傍則有朱漣丹渚是也

又東南過江夏雲杜縣東夏水從西來注之

即胙口也

一清按寰宇記沔陽縣下云周地圖經云
夏水合胙水同入漢水自漢入胙名為七

里汙即屈原逢漁父與言濯纓鼓枻而去是此地全
祖望曰按夏水決入之地曰脂口非有脂水也而記
又引荊州圖副及盛宏之說則亦為中夏水縣故邛
不以為有水名諸也互見夏水篇

亭左傳所謂若教娶于邛是也禹貢所謂雲土夢作
乂故縣取名焉縣有雲夢城城在東北沔水又東逕

左桑昔周昭王南征船人膠舟以進之昭王渡河中
流而沒死于是水齊楚之會齊侯曰昭王南征而不
復寡人是問屈原曰君其問諸水濱庚仲雍言村老
云百姓佐昭王喪事於此成禮而行故曰佐喪左桑

字失體耳。沔水又東合巨亮水。口水北承巨亮湖南達于沔。沔水又東得合驛口。庾仲雍言須導村者舊云朝廷驛使合王喪於是因以名焉。今須導村正有大斂口。言昭王于此殞斂矣。沔水又東謂之橫桑。言得昭王喪處也。沔水又東謂之鄭公潭。言鄭武公與王同溺水於是。余謂世數既懸為不近情矣。斯乃楚之鄭鄉守邑大夫僭言公故。世以為鄭公潭耳。全氏曰同死者是祭公此或以鄭丹遺愛得名沔水又東得死。沔言昭王濟沔自是死。

故有死沔之稱王尸豈逆流乎但千古茫昧難以昭

知非其事類似是而非矣

全氏曰死沔之沔亦如死汝死過死沙死穀之類皆

水之沔水又東與力口合有沔水出竟陵郡新陽縣
枯者

西南池河山

一清按河地山字誤方輿紀要承天府沔陽州景陵縣東北七十五里有回河

自府北池河分流經此又東南入于沔水景陵楚竟
陵邑漢屬江夏郡晉末分置甯城縣回河即沔水也

沔回聲相近又府北十五里有直河俗呼為池河源
出大洪山山在京山縣北二十里京山前漢為雲杜

安陸二縣地後漢為雲杜南新市二縣地晉惠帝時
析置新陽縣屬竟陵郡然則池河山即大洪山直河

即枝水也今本誤寫池為地又倒互池河作河地遂
難通曉耳寰宇記郢州京山縣南有泗水云在縣東

四十里東入復州竟陵界泗河亦作池河之
誤道元洙水篇注云泗或作池字可證也東流逕

新陽縣南縣治雲杜故城分雲杜立洩水又東南流

注宵城縣南大湖又南入于沔水是曰力口沔水又

東南涓水入焉沔水又東逕沱水口水南通沔陽縣

之太白湖湖水東南通江又謂之沱口沔水又東逕

沱陽縣北處沱水之陽也沔水又東逕林鄆故城北

一清按林鄆亦作臨嶧顧祖禹云臨嶧即沔陽也有
臨嶧山在漢陽府西六十里詹山臨江盤基數十里

晉于山下置沔陽縣今亦云城頭山有峰
曰烏林峰俗謂之赤壁誤也並見江水註晉建興二

年太尉陶侃為荊州鎮此也

又南至江夏沙羨縣北南入于江

庾仲雍曰夏口一日沔口矣尚書禹貢云漢水南至大別入江春秋左傳定公四年吳師伐郢楚子常濟漢而陳自小別至于大別京相璠春秋土地名曰大別漢東山名也在安豐縣南杜預釋地曰二別近漢之名無緣乃在安豐也案地說言漢水東行觸大別之阪南與江合則與尚書杜預相符但今不知所是

矣一清按方輿記要漢陽府下云大別山在府城東北漢江之右一名魯山一名翼際山小別山在漢州縣南十里亦名觀山決水篇廬江雩婁縣之大別山別是一山非禹貢之大別也卷末釋禹貢山水澤地所在仍誤以為在安豐蓋惑于班志而不能別白也

沔水與江合流又東過彭蠡澤

尚書禹貢匯澤也鄭玄曰匯回也漢與江鬬轉東成其澤矣

又東北出居巢縣南

古巢國也湯伐桀桀奔南巢即巢澤也尚書周有巢

伯來朝春秋文公十二年夏楚人圍巢巢羣舒國也
舒叛故圍之永平元年漢明帝更封菑丘侯劉般為
侯國也江水自濡須口又東左會柵口水導巢湖東
逕烏上城北又東逕南譙僑郡城南又東絕塘逕附
農山北又東左會清溪水水出東北馬子峴之清溪
也東逕青谿城南屈而西南流歷山西南流注柵水
謂之清谿口柵水又東左會白石山水水發白石山
西逕李鵲城南西南流注柵水柵水又東南積而為

實湖中有州湖東有韓縱山

全氏曰韓縱即韓綜吳將韓當子事見吳書縱

綜字通

山上有城山北湖水東出為後塘北湖湖南即

塘也塘上有潁川橋郡故城也實湖水東出謂之實

湖口湖水東出逕刺史山北歷韓縱山南逕流二山

之間出王武子城北城在刺史山上湖水又東逕右

塘穴北為中塘塘在四水中水出格虎山北山上有

虎山城有郭僧坎城水北有趙祖悅城並故東關城

也昔諸葛恪帥師作東興隄以遏巢湖傍山築城使

將軍全端留略等各以千人守之魏遣司馬昭督鎮

東諸葛誕率衆攻東關三城

一清按吳書諸葛恪傳云恪以建興元年十月

會衆于東興更作大堤左右結山扶築兩城魏命大將胡遵諸葛誕等作浮橋度陣于堤上分兵攻兩城三嗣主傳云全端守西城留略守東城通鑑陳大建五年遣吳明徹等北伐別將任衆軍于東關克齊東西二城顧祖禹曰即諸葛恪所築此云三城按朱然傳云曹公出濡須然備大塢及三關屯大塢即濡須塢三關即東興關也是東興本有三城其將毀堤遏後元魏更分築兩城耳三字亦非誤也

諸軍作浮梁陳于堤上分兵攻城恪遣冠軍丁奉等登塘鼓譟奮擊朱異等以水軍攻浮梁魏征東胡遵

軍士爭渡梁壞投水而死者數千塘即東興堤城亦
闕城也柵水又東南逕高江產城南胡景略城北又
東南逕張祖禧城南東南流屈而北逕鄭衛尉城西
魏事已久難用取悉推舊訪新略究如此又北委折
蒲浦出焉柵水又東南流注于大江謂之柵水口

又東過牛渚縣南

一清按牛渚圻名漢末嘗置縣也注云牛渚在姑孰烏江兩縣界中姑孰

今當塗縣地烏江廢縣在和州東北四十里蓋夾江南北岸也寰宇記太平州當塗縣下云淮南記曰吳初以周瑜屯牛渚晉鎮西將軍謝尚亦鎮此城而牛渚山上有宋石戍在城西北山上之巖狹處然則雖未五縣而

未嘗無城也縣字或
當作圻亦或是城字
又東至石城縣

經所謂石城縣者即宣城郡之石城縣也牛渚在姑

孰烏江兩縣界中也於石城東北減五百許里安得

逕牛渚而方屈石城也蓋經之繆誤也

一清按文選
殷仲文南州

桓公九井作詩李善注引水經注云淮南郡之于湖
縣南所謂姑孰即南州矣今本無之姑孰于湖今太
平府當塗縣地晉咸和初僑置淮南郡于此九井山
在龍山之南桓溫所鑿元興二年桓玄募禪位壇于
九井山北大江在西北梁承聖初王僧辨討侯景
至姑孰景將侯子鑒度南州于岸挑戰即此處也

分為二其一東北流其一又過毗陵縣北為大江

地理志曰毗陵縣舊會稽之屬縣也丹徒縣北二百步有故城本毗陵郡治也舊去江三里岸稍毀遂至城下城北有揚州刺史劉繇墓淪于江江即北江也

經書在北則可又言東至餘姚則非考其逕流知經

之誤矣

一清按大江不得東至餘姚入海道元證經丈為誤是矣而其下以分江水合為南江以

應餘姚入海之丈水名已殊而其道亦變不特非禹貢三江之迹并班志所記亦多不合地理志

曰江水自石城東出逕吳國南為南江

胡氏渭曰按志以分江水

繫石城南江繫吳縣至道元始貫穿為一條一清按道元依經立注誤以震澤為南江而又合分江水言

之謂其水得至餘姚入海也遂改竄班書以就已說
且班志云吳故國周太伯所居六朝時曰吳國道元
因改縣江水自石城東入為貴口東逕石城縣北晉
曰國也

太康元年隸宣城郡東合大谿谿水首受江北逕其

縣故城東又北入南江南江又東與貴長池水合水

出縣南郎山北流為貴長池池水又北注于南江南

江又東逕宣城之臨城縣南又東合注涇水

一清按漢志丹

陽郡涇縣注韋昭曰涇水出蕪湖

南江又東與桐水合又東逕安吳

縣號曰安吳谿又東旋溪水注之水出陵陽山下逕

陵陽縣西為旋谿水昔銍縣人陵陽子明釣得白龍
處後三年龍迎子明上陵陽山山去地千餘丈後百
餘年呼山下人令上山半與語谿中子安問子明釣
居所在後二十年子安死葬山下有黃鶴栖其冢樹
鳴常呼子安故縣取名焉晉咸康四年改曰廣陽縣
谿水又北合東谿水水出南里山北逕其縣東桑欽
曰淮水出縣之東南北入大江全氏曰按漢志丹陽
郡陵陽縣下亦引桑
欽語今宣城人呼為小淮水乃東壩之上游也其水又北歷蜀由山又北左

合旋谿北逕安吳縣東晉太康元年分宛陵立縣南
有落星山山有懸水五十餘丈下為深潭潭水東北
流左入旋谿而同南注江江之北即宛陵縣界也南
江又東逕寧國縣南晉太康元年分宛陵置南江又
東逕故鄣縣南安吉縣北光和之末天下大亂此鄉
保險守節漢朝嘉之中平二年分故鄣之南鄉以為
安吉縣縣南有釣頭泉懸湧一仞乃流于川川水下
合南江南江又東北為長瀆歷湖口南江東注于具

區

一清按漢志會稽郡吳縣其區澤在西揚州數古文以為震澤

謂之五湖口五湖

謂長蕩湖太湖射湖貴湖滬湖也

全氏曰按虞翻說無長蕩湖有北湖

謂長蕩即洮也韋昭說則以為胥湖蠡湖洮湖滬湖與太湖而為五其謂五湖祇一太湖者張勗吳錄也朱長文續吳郡圖經曰道元謂長蕩湖貴湖上湖滬湖與太湖而為五蓋以射湖已與貴湖合也抑或所見之本異耶吳志云貢湖游湖梅梁湖金鼎湖胥湖其名皆出于近代也今吳中人又謂射貴湖即上湖

郭景純江賦曰注五湖以漫漭蓋言江水經緯五湖

而芭注太湖也是以左丘明述國語曰越伐吳戰于

五湖是也又云范蠡滅吳返至五湖而辭越斯乃太

湖之兼攝通稱也虞翻曰是湖有五道故曰五湖韋

昭曰五湖今太湖也尚書謂之震澤爾雅以為具區

方員五百里

禹貢錐指曰具區五湖明是兩處而孔傳謂太湖一名震澤正義為之辭曰餘

州浸數各異而揚州浸數同處論其水謂之浸指其數謂之澤此說非也葉少蘊云凡言數者皆人所資以為利故曰數以富得名而浸則但水之所鍾揚州之數為震澤今平望八赤震澤之間水瀾漫而極淺其蒲魚蓮芡之利人所資者甚廣亦或可隄而為田與太湖異所以謂之澤數然積潦暴至無以洩之則溢而為害所以謂之震澤黃子鴻申其義曰今土人自包山以西謂之西太湖水始淵深自莫釐武山以東謂之南湖水極灘淺蓋即古之震澤止以上流相通後人遂混謂之太湖按此辨周官之數浸極其明

晰班志曰在吳西亦未當孔氏
書傳鄭氏周禮注云在吳南

湖有苞山春秋謂之

夫椒山有洞室入地潛行北通瑯邪東武縣俗謂之
洞庭旁有青山一名夏架山山有洞穴潛通洞庭山
上有石鼓長丈餘鳴則有兵故吳記曰太湖有包山
在國西百餘里居者數百家出弓弩材旁有小山山
有石穴南通洞庭深遠莫知所極三苗之國左洞庭
右彭蠡今宮亭湖也太湖之洞庭對彭蠡則左右
可知也余按二湖俱以洞庭為目者亦分為左右也

但以趣矚為方耳既據三苗宜以湘江為正是郭景

純之江賦云爰有包山洞庭巴陵地道潛達旁通幽

岫窈窕

朱彝尊詩話云吳有洞庭山名也楚有洞庭湖名也郭景純云吳有包山洞庭巴陵地道

潛達旁通

幽岫

窈窕蓋謂山有石穴通吳之包山

玟包山亦以洞庭名鄒善長注水經二湖俱以洞庭為目誤也一清按善長未嘗以吳之洞庭為即楚之洞庭吳中之山曰洞庭而湖亦即其稱既有斯名不可得而沒也朱氏蓋未之審耳

山海經曰浮玉之山北望具區苦水

出于其陰北流注于具區謝康樂云山海經浮玉之

山在句餘東五里

一清按山海經文是又東五百里不云在句餘東五里謝誤引或五

下脫百字耳便是句餘縣之東山乃應入海具區一清按此二字

誤疑作句餘今在餘姚烏道山西北何由北望具區也以

為郭於地理甚昧矣一清按全氏曰是蓋以南江當其區然則其川三江而說者又

以此水當之何也吳任臣山海經廣註曰謝言山水微與今時不合未足為據也唐子霞云天目山一名

浮至山與山海經所記句餘道里不差于言洞庭南北望具區之丈又合然則謝說誠悠繆也

口有羅浮山高三千六百丈浮山東石樓下有兩石

數扣之清越所謂神鉦者也事備羅浮山記會稽山

宜直湖南又有山陰谿水入焉山陰縣西四十里有

二谿

一清按此處何以闌入山陰縣山陰隔越浙江之東苕水在其西鄆以山陰谿水即苕水則具

區山之陰所出之水也行間斷爛後人見上有山陰二字即填入縣字而水道不可問矣東谿廣

一丈九尺冬煖夏冷西谿廣三丈五尺冬冷夏煖二

谿北出行三里至徐村合成一谿廣五丈餘而溫涼

又雜蓋山海經所謂苕水也北逕羅浮山而下注於

太湖故言出其陰入于其區也湖中有大雷小雷三

山亦謂之三山湖又謂之洞庭湖楊泉五湖賦曰頭

首無錫足蹠松江負鳥程于背上懷太湖以當胸峯

寧崔嵬穹窿紆曲大雷小雷湍波相逐用言湖之苞
極也太湖之東吳國西十八里有岵嶺山俗說此山
本在太湖中禹治水移進近吳又東極西南有兩小
山皆有石如卷拳俗云禹所開牽山也太湖中有淺
地長老云是笮嶺山蹶自此以東差深言是牽山之
溝此山去太湖三十餘里

董氏斯張廣博物志曰水經注太湖中穹窿山有銅

闕今本無之全氏曰自潛通琅邪以下東則松江出
皆襲山海經無稽之言而更廣為傳會

焉上承太湖更逕笠澤在吳南松江左右也國語曰

越伐吳吳禦之笠澤越軍江南吳軍江北者也虞氏
曰松江北去吳國南五十里江側有丞胥二山山各
有廟魯哀公十三年越使二大夫疇無餘謳陽等伐
吳吳人敗之獲二大夫大夫死故立廟于山上號曰
丞胥二王也胥山上今有壇石長老云胥神所治也
下有九折路南出太湖闔閭造以遊姑胥之臺以望
太湖也松江自湖東北流逕七十里江水奇分謂之
三江口

禹貢雖指曰南江既入太湖而東為松江則
無更從餘姚入海之埋道元曲為此說以應

漢志南江吳越春秋稱范蠡去越乘舟出三江之口
在南之丈

入五湖之中者也此亦別為三江五湖雖稱

一清按下有脫

字相亂不與職方同庾仲初揚都賦注曰今太湖東

注為松江下七十里有水口分流東北入海為婁江

東南入海為東江與松江而三此非禹貢之三江也

一清按明此可以辨止蔡九峯書傳之謬吳記曰一江東南行七十里入

小湖為次谿自湖東南出謂之谷水吳記曰谷水出

吳小湖逕由卷縣故城下神異傳曰由卷縣秦時長

水縣也始皇時縣有童謠城門當有血城陷沒為湖
有老嫗聞之憂懼旦往窺城門門將欲縛之嫗言其
故嫗去後門將煞犬以血塗門嫗又往見血走去不
敢顧忽有大水長欲沒縣主簿令幹入白令令見幹
曰何忽作魚幹又曰明府亦作魚遂乃淪陷為谷矣
因目長水城水曰谷水也吳記曰谷中有城故由卷
縣治也即吳之柴辟亭故就李鄉橋李之地秦始
皇惡其勢王令囚徒十餘萬人汙其土表以汙惡

名改曰四卷亦曰由卷也吳黃龍四年有嘉禾生卷

縣改曰禾興

一清按吳書豫權傳黃龍三年夏由奉野稻自生改為禾興冬十二月丁卯大

赦改明年元也則是嘉禾改元定後太子諱和改為
在三年之冬此云四年字誤耳

嘉興春秋之槁李城也谷水又東南逕嘉興縣城西

谷水又東南逕鹽官縣故城南舊吳海昌都尉治晉

太康中分嘉興立太康地道記吳有鹽官縣樂資九

州志曰縣有秦逕山秦始皇逕此吳人死葬于山上

山下有美人廟谷水之右有馬鞞城故司鹽都尉城

吳王濞煮海為鹽于此縣也是以漢書地理志曰縣有鹽官東出五十里有武原鄉故越地也秦於其地置海鹽縣地理志曰縣故武原鄉也後縣淪為柘湖又徙治武原鄉改曰武原縣王莽名之展武漢安帝時武原之地又淪為湖今之當湖也後乃移此一清按劉昭補註郡國志曰今計偕簿海鹽縣之故治順帝時陷而為湖今謂為當湖大旱湖竭城郭之處可識縣南有秦望山秦始皇所登以望東海故山得其名為谷水於縣出為澉浦以通巨海光熙元年有毛民

三人集于縣蓋汎于風也禹貢雖指曰禹貢三江之不明誤自班固始漢志會

稽吳縣下云南江在南東入海毗陵縣下云北江在北東入海丹陽蕪湖縣下云中江出西南東至陽羨入海皆揚州川也蓋北江為經流至江都入海中江由吳淞入海南江合浙江入海皆北江之枝瀆也導水明言漢自彭蠡東為北江江自彭蠡東為中江誠如班氏所言則蕪湖之中江何以知為江水之所分毗陵之北江何以定為漢水之所獨乎以此當禹貢三江之二雖愚者亦知其非矣又曰漢志丹陽石城縣下云分江水首受江東至餘姚入海過郡二行千二百里此即南江之源委過郡二謂丹陽會稽也其在吳縣南者即吳松江乃中江之下流班氏不知分江水至餘姚入海者即古之南江遂誤以松江當之耳今按大江自西南來至石城枝分為分江水至餘姚入海又東北流至蕪湖枝分為永陽江由吳松入

海其經流則東逕毗陵至江都入海毗陵江都最北故謂之北江石城餘姚最南故謂之南江蕪湖吳縣居二江之中故謂之中江雖與禹貢導江之義不合而辨方命名次第秩然與郭景純之松江浙江源異而流則同也蓋中江貫震澤松江即其下流不得復析為南江南江首受石城之大江其自湖口洩入具區者乃枝流而東至餘姚入海者其正流也鄆元恐達漢志反以雁烏程縣南者為枝流而中江盡于荆溪南江即是吳松矣非古人命名之本意也一清按禹貢以漾漢觸大別南入于江東匯澤為彭蠡東為北江江水東迤北會于滙東為中江而不言南江但三江既入揚州之水已治而大別則在荆域于是班固疑之別著三江之道以為南江在吳南水經更以震澤當之而又無中江之目遂與經異蓋經所謂江水至石城縣分為二其一東北流者中江也其一過毗陵縣為大江鄆以北江釋之其下又以南江當之

以其在毗陵縣之北故名之曰北江而東至餘姚入海則仍是南江水道故以經文大江二字為誤中江水見江水篇而今亡矣東樵云北江為經流中江由吳淞入海南江合浙江入海今據班志而言實則班志蜀郡蒲氏道下云禹貢岷山在西徼外江水所出東南至江都入海而廣陵國江都下急著江水祠以應之又于臨淮郡海陵下復云有江海會祠以明之海陵江都非揚域乎非中江入海之道乎其于會稽郡之吳毗陵丹陽郡之蕪湖雖列南北中之名而無禹貢字則亦可知是秦漢以來現行之川作志者自不闕禹迹也後人乃欲據志以釋經反謂志與經不合則亦誣矣水經本班志以立文然班志石城之分江水自是分中江之水而別為一支者至道元始名為南江故云水名已殊非班固所謂南江也大抵多衰周時以人力為之而非天地自然節宣之氣可比南江至餘姚與浙江合又于餘暨東與浦陽合由太

湖長濱口上通臨平湖而東合浙江之柘浦今其水道多不可問後之釋水者宜無取于此卷也

又東至會稽餘姚縣東入于海

謝靈運云具區在餘姚然則餘暨是餘姚之別名也

全氏曰按餘暨今之蕭山今餘暨之南餘姚西北浙也如何以為餘姚之別名

江與浦陽江同會歸海但水名已殊非班固所謂南

江也郭景純曰三江者岷江松江浙江也

隋書經籍志水經三

卷郭璞撰然浙江出南蠻中不與岷江同作者述誌今失傳

多言江水至山陰為浙江今南江枝分歷烏程縣南

通餘杭縣

禹貢雖指曰餘杭乃姚字之誤

則與浙江合故闕駟十三

州志曰江水至會稽與浙江合

禹貢雖指曰班固所謂南江者實松江也

闕駟所謂江水至會稽與浙江合者即分江水水經謂之南江者也或以為北江大繆鄒道元篤信班固

故不能無疑于此又曰江水自湖口以東歷烏程縣

南通餘姚與浙江合者其故道亦無可考蓋從烏程

南以東達于餘姚則必經歸安德清石門界中至海

寧由浙江以入海海寧地獨高境內諸水皆北流故

宋元嘉及梁大通中以滬漬不通嘗欲穿渠引吳興

之水以瀉浙江而功卒不立蓋水性就下地勢有所

阻也南江必衰周時吳越以人力為之易致壅塞歷

世久遠不可得詳一清按東樵之言非也以松江為

南江正是鄒注今混作經道元何嘗有疑于此乎且

南江與浙江合由太湖長瀆口上通臨平湖以合浙

江自有經絡何必載之高地乎通鑑唐乾寧二年楊
行密遣安仁義以舟師至湖州欲渡江應董昌錢鏐
遣顧全武守西陵仁義不得渡胡三省曰自湖州舟
行入柳浦可渡西陵又柳浦即今湖江亭東跨浦橋
之浦也劉昫唐書曰隋于餘杭縣置杭州又自餘杭
徙治錢唐又移于柳浦今州城是又曰柳浦埭即今
杭州江干浙江亭北跨浦橋

埭則其時水道尚未盡湮也

浙江自臨平湖南通浦

陽江

一清按臨平湖在浙江西何以反自湖南通浦陽江乎此文客有錯繆

又於餘暨

東合浦陽江自秦望分派東至餘姚縣又為江也東

與車箱水合水出車箱山乘高瀑布四十餘丈雖有

水旱而澍無增減江水又東逕黃橋下臨江有漢蜀


郡太守黃昌宅橋本昌創建也昌為州書佐妻遇賊相失後會于蜀復修舊好江水又東逕赭山南虞翻嘗登此山四望誠子孫可居江北世有祿位居江南則不昌也然住江北者相繼代興時在江南者輒多淪替仲翔之言為有徵矣江水又逕官倉倉即日南太守虞國舊宅號曰西虞以其兄光居縣東故也是地即其雙雁送故處一清按寰宇記雙雁樓墓事謂是虞歆即翻之父亦嘗為日南太守此用孔安會稽志作虞國而寰宇記鄖縣下江又引郡國志作陳國蓋陳虞同姓陳國即虞國也江

水又東逕餘姚縣故城南縣城是吳將朱然所築也
南臨江津北背巨海夫子所謂滄海浩浩萬里之淵
也縣西去會稽一百四十里因其句餘山以名縣山
在餘姚之南句章之北也江水又東逕穴湖塘湖水
沃具一縣並為良疇矣江水又東注于海是所謂三
江者也故子胥曰吳越之國三江環之民無所移矣
但東南地卑萬流所湊濤湖泛決觸地成川枝津交
渠世家分夥故川舊瀆難以取悉雖麤依縣地緝綜

所纏亦未必一得其實也

一清按此篇經注多脫誤客有後人附益之辭讀者

審之



水經注釋卷二十八